

Fo fato scurtinio de do proveditori sora le biave, et poleno esser tolti de quelli è fuora dil Conseio di X: rimaseno sier Piero Bragadin fo consier, sier Hironimo Querini fo cao dil Conseio di X, solo sier Antonio di Prioli procurator, et tolti in tuto numero 14, i qual è qui sotoscriti.

Fu fato scurtinio di 3 proveditori sora i Monti et refati quelli sono al presente, *videlicet* sier Andrea Trivixan el cavalier, sier Lorenzo Bragadin et sier Francesco di Prioli procurator; fono tolti sier Francesco Donado el cavalier, sier Alvisè Mocenigo el cavalier, sier Priamo da Leze; et sier Domenego Trivixan procurator non se provò.

Da poi restò el Conseio di X semplice per certo caso seguito a li Colegi: sier Piero Mocenigo se caza con suo fratello consier, sier Filippo Trun se caza con sier Piero Trun inquisitor, et sier Lunardo da Canal è stà el mexe passato et per le leze non pol esser questo altro mexe al dito Collegio straordinario, *unde* fu posto et preso che 'l dito Canal continui non obstante la lege in contrario.

Questi sono tolti sora le biave: Sier Piero Bragadin 22, sier Hironimo Querini 19, sier Antonio di Prioli procurator 16, sier Francesco Foscari, sier Priamo da Leze, sier Alvisè Bon, sier Zuan Francesco Morexini, sier Hironimo Polani dottor, sier Hironimo Zen procurator, sier Andrea Mozenigo dottor, sier Pòlo Valaresso qu. sier Ferigo, sier Marco Zantani, sier Andrea Gusoni proveditor, sier Andrea Vendramin.

A dì 8, la matina. Fo *lettere dil Zante, dil proveditor de l' armada Pasqualigo, di 16, in consonantia di quanto si ave dal proveditor dil Zante*

In questo zorno, fo la sagra di San Marco. Li officii nè le Quarantie non sentano, ma ben si lavora per la tera.

Da poi disnar, fo collegio di Savi, et vene *lettere di l' orator nostro, di* . . . con il brieve de poter trar l'intrade de Romagna a nostri, reformando, dando cauzion di beni, da julio in poi.

A dì 9, la matina. Fo *lettere di Viena di sier Marco Antonio Contarini orator nostro, di primo Octubrio*. Il sumario è qui avanti.

Vene l' orator cesareo per saper di novo, li fo dito la continentia di le lettere nostre.

Vene l' orator de Milan, con alcuni avisi di Germania in consonantia de nostri.

Fo parlato de far Pregadi hozi et far oratori a compagnar la Cesarea Maestà et scriver al capitano

zeneral mandi galle a disarmare, per alleviarsi la spexa.

Da poi disnar, adunca, fo Pregadi, et lete le lettere venute questi zorni.

Poi sier Hironimo da chà da Pexaro stato con sier Anzolo Cabriel et sier Alvisè Badoer avogadori extraordinari fuora 4 mexi in sindichà, andò in renga et referite, dicendo che tre cose mantien. Li Stati haver cura de subditi, de danari publici et la observantia di le leze, et hessendo stati fuora dirà prima di Et comenzò di Treviso, trovòno gran disordini in la Camera, in le fabriche gran robarie, fevano mercado de 50 cara de pierè non ne havea 25, et quelli erano pagati per tuta la quantità; poi le taie se pagava con danari de daci che non se pol se non de condanason pagarse. È stato lui a Coneian, laudò sier Zuan da Molin podestà et capitano de li. È stà a Uderzo si fa gran cose de condanar vilani, et sopra questo disse molte cose, si observa non è tarifa in alcun luogo de scriturè; a Sazil laudò sier Candian Bolani podestà et capitano. Veneno a Padoa, gran desordini in la Camera, debitori de daci falidi per ducati 24 milia dal 1526 in quà, et li piezi non è boni. Fono a Vicenza et Verona, si tuò el quartò di le condanason in li rectori et camerlenghi, et la quinta dil resto non è niente. Fo a Cologna, laudò sier Zuan Malipiero podestà de li. Veneno poi a Udine, debitori assai in quella Camera, tal è debitor de ducati 1500 che non ha pagato, et è stà suspeso per lettere di quà, *videlicet* el patriarca, *conclusive* hanno visto grandissimi desordini, per tuto fato processi per zornata se expedirano, fato render danari a molti; disse di lettere venute de quà che suspendeva el pagar et fatto termine a daziari a pagar, che non se pol far si non con questo Conseio. A Udene poleno far poco perchè el tempo li incalzava. *Conclusive* vilani è mal trattati da li rectori de castelli, et le angarie se mete a le cità li cittadini carga a li teritori. Disse hanno mandato in questa tera dueati 4500. Laudò Nicolò de Cabriel stato suo nodaro et Agustin Cataben stato suo rasonato et Hironimo Felèto stato suo cogitor, et vene zoso

El Serenissimo parlò a parte respondendo et che dovea parlar più apertamente et dovesseno far gaiardamente, li darà ogni favor, et è mal li teritori sia cussi strusiadi da li nostri rectori, i qual fo quelli ne conservò el Stato, con altre parole, si che parlò benissimo.

Fu poi posto, per li Savi dil Conseio et Terra fer-